

Boiphihlelo ba Bonngoe Kerekeng ea Pele



SABATHA MANTSIBOEA

Bakeng sa Boithuto ba Beke Ena Bala:

Liketso 1:12–14, Liketso 2:5–13, Tšen. 14:12, Liketso 2:42–47, Liketso 4:32–37, Liketso 5:1–11, 2 Ba-Kor. 9:8–15.

Teman'a Khopolo:

“Ba ne ba tiisetse thutong ea baapostola, le kopanong ea boena, le ho ngoathoeng ha bohobe, le merapelong”(Liketso 2:42).

Bonngoe ba Kereke ke tholoana ea maiphihlelo a tšoanang ho Jesu, eo e leng 'nete. “Ke 'na tsela, le 'nete, le bophelo; ha ho motho ea ka tlang ho Ntate, ha e se ka 'na” (Johanne 14:6). Litlamo tse tiileng tsa boena li etsahala leetong le maiphihlelong a tšoanang a semoea. Baleti ba pele ba bile le maiphihlelo a joalo sehlopheng sa ba-Miller. Boiphihlelo ba bona bo tšoanang ka 1844 bo ile ba tlamahanya lipelo tsa bona hammoho ha ba ntse ba leka ho fumana tlhaloso ea tsoabo. Boiphihlelo bona bo tsoetse Kereke ea Baleti ba Letsatsi la Bosupa, le 'nete ea kahlolo ea pele ho hotla labobeli, le sohle se phuthetsoeng ke sona. Boiphihlelo ba barutuo ba Jesu kamor'a nyolohelo ea Hae leholimong ke bopaki bo matla ba Lentsoe la Molimo, thapelo, le kopano ea boena tabeng ea ho etsa bonngoe le kutloano har'a balumeli ba tsoang libakeng tse fapaneng. Boiphihlelo bo tšoanang bo ntse bo ka etsahala le kajeno. “Ke tiisa hore kopano ea boena ke ntlha ea bohlokoa khumamelong e kopanetsoeng. . . . Ho Mokreste ha ho na se ka nkelang sebaka tlhokomelo ea tlamo ea moea e mo tlamahanyang le balumeli ba bang hape le Morena Jesu Krete. . . . Jesu Krete o qala ka ho tiisa moea ho Eena, empa kamehla o kopanya moea oo le meea e meng ea balumeli e 'meleng oa Hae, kereke.”—Robert G. Rayburn, *O Come, Let Us Worship* (Grand Rapids: Baker Book House, 1980), leq. 91.

**Ihute thuto ea beke ena ho lokisetse Sabatha sa la 3 Pulungoana.*

Matsatsi a Tlhekelo

Lihoreng tsa ho qetela tseo a li hlotseng le barutuo ba pele ho lefu la Hae, Jesu o ile a tšepisa hore ha a ka ke a ba siea ba le bang. Ho ne ho tla romeloa Moemeli e mong ho tsamaea le bona boromuoaeng ba bona. Moea o ne o tla ba hopotsa lintho tse ngata tseo Jesu a li buileng le ho li etsa (Johanne 14:26), o be o ba tataise hore ba fumane linnete tse ling tse ngata (Johanne 16:13). Letsatsing la nyolohelo ea Hae, Jesu o ile a nchafatsa tšepiso ena. “‘Le tla kolobetsoa ka Moea o Halalelang, ha ho fetile matsatsi a se makae. . . . Le tla fuoa matla mohla Moea o Halalelang o tlang ho lona’” (Liketso 1:5, 8). Matla a Moea o Halalelang a tla fanoa ho thusa barutuo ho ba lipaki Jerusalema, Judea, Samaria, le ho isa lipheletsong tsa lefatše (Liketso 1:8).

Bala Liketso 1:12–14. Barutuo ba ile ba etsang ka nako ea matsatsi a leshome?

Re ka nahana matsatsi ana a leshome e le nako ea tlhekelo e tebileng, mofuta oa boikhutso oo ka oona barutuo bana ba neng ba arolelana mehopolo ea bona ka Jesu, liketso tsa Hae, lithuto tsa Hae, le mehlolo ea Hae. Ba ne ba “tiisetsa ka pelo e le ’ngoe ho rapela le ho kopa” (Liketso 1:14). “Ha barutuo ba emetse phethahatso ea tšepiso, ba ile ba kokobetsa lipelo tsa bona ka pako ea ’nete ’me ba bolela ho hloka tumelo ha bona. Ha ba hopola mantsoe ao Kreste a a buileng le bona pele ho lefu la Hae, ba utloisisa ka botlalo bo fetisang seo a neng a se bolela. Linnete tseo ba neng ba se ba li lebetse tsa khutela likelellong tsa bona hape, ’me ba li phetelana. Ba ikoahlaea ka lebaka la ho se utloisise Mopholosi. Joaloka mokoloko, ketsahalo kamor’a ketsahalo ea bophelo ba Hae bo hlolland ea feta kapel’ a bona. Ha ba ntse ba nahana ka bophelo ba Hae bo hloekileng, bo halalelang, ba ikutloa hore ha ho mosebetsi o ka ba sitang ka boima, ha ho sehlabelo se ka bang sehlo haholo, ha feela ba ka fana ka bopaki mapheleng a bona ka ho rateha ha semelo sa Kreste. O, ha ba ne ba ka phela lilemo tse fetileng tse tharo hape, ba nahana, ba ne ba ka etsa lintho ka tsela e fapaneng ha ka kang! Hoja n’e ba ka bona Morena hape, ba ne ba ka sebetsa ka matla ho mo bontša kamoo lerato la bona ho Eena le tebileng kateng, le kamoo ba utloileng bohloko haholo ka lebaka la ho mo utloisa bohloko e ka ba ka lipuo kapa ka liketso tsa ho hloka tumelo! Empa ba ile ba khotatsoa ke mohopolo oa hore ba tšoaretswe ’me ba ikemisetsa hore, ka hohle kamoo ho ka khonehang kateng, ba tla lefella ho se lumele ha bona ka ho mo bolela ka sebete kapele ho lefatše. . . . Ba behela liphapang tsohle kathoko, le takatso ea bookameli, ba tla hammoho kopanong ea boena ea Bokreste.”—Ellen G. White, *The Liketso of the Apostles*, maq. 36, 37.

Ke lintho life tseo o lakatsang e ka u ka li etsa hape tumelong ea hau? U ka ithuta eng boikoahlaeong ba hau ka lintho tse fetileng e ka u thusang ho phela bokamoso ka tsela e molemo ho fetisisa?

Ho Tloha Babele Ho Ea Ho Pentekonta

Matsatsi a boitokiso ba semoea, kmaor'a nyolohelo ea Jesu a ile a qetella ka Pentekonta. Temana ea pele e re bolella hore ka letsatsi leo, nakoana pele Moea o Halalelang o tšolelloa barutuoa, ba ne ba le 'moho, "ba le khopolo e le 'ngoe," sebakeng se le seng (Liketso 2:1). Testamenteng ea Khale, Pentekonta e ne e le mokete oa bobeli ho e meraro ea mantlha oo mo-Israela e mong le e mong e motona a neng a tlameha ho ea ho oona. O ne o tšoaroa matsatsi a mashome a mahlano (ka se-Gerike, pentekoste, letsatsi la mashome a mahlano) kamor'a Paseka. Nakong eo ba-Heberu ba ne ba hlahisetsa Molimo litholoana tsa pele tsa kotulo ea bona ea lehlabula e le nyehelo ea teboho. Ho ka etsahala hore e be nakong ea Jesu mokete ona o ne o kenyelletsa le ho ketekela phano ea molao Thabeng ea Sinai. (Exod. 19:1). Ka mokhoa o joalo, re bona mona bohlokoa bo tsoelang pele ba molao oa Molimo e le karolo ea molaetsa oa Bokreste mabapi le Jesu, eo lefu la Hae le fanang ka tšoarelo ho e mong le e mong ea bakelang tlolo ea hae ea molao oa Molimo. Ha ho makatse hore e 'ngoe ea litemana tsa bohlokoa tse buang ka matsatsi a bofeloe e sebitsana le molao le evangeli ka bobeli: "Ke moo ho tla bonahala mamello ea bahalaleli, e leng ba bolokang litaelo tsa Molimo le tumelo ea bona ho Jesu" (Tšen. 14:12). Hape, joaloka Thabeng ea Sinai, ha Moshe a ne a amohela Melao e Leshome (Exod. 19:16–25, Ba-Heb. 12:18), ho ile ha etsahala liketsahalo tse ngata tsa mohlolo ka Pentekonta. "Joale hang, ha utloahala molumo o tsoang leholimong, o kang oa moea o fokang ka sefefe; ntlo eohle eo ba lutseng ho cona ea tlala oona; maleme a arohaneng, a kang malakabe a mollo, a ba hlahela, a lula holim'a e mong le e mong oa bona. 'Me bohle ba tlala Moea o Halalelang, 'me ba qala ho bua ka lipuo lisele, kamoo Moea o ba buisang kateng" (Liketso 2:2–4).

Bala Liketso 2:5–13. Bohlokoa ba ketsahalo ee e hlollang ke bo fe?

Pentekonta e ne e lokela ho ba mokete oa monyaka, mokete oa liteboho ho Jehova ka lebaka la menono ea Hae. Lena, mohlomong, ke lona lebaka la ho qosoa ka botaoa ho fosahetseng (Liketso 2:13–15). Matla a Molimo a bonahala haholo tabeng ea ho bua le ho utloa maleme a fapaneng. Ba-Juda bohle ba neng ba tlile Jerusalem moketeng ho tsoa hohle pusong ea Roma ba utloa molaetsa oa Jesu, Mesia, ka lipuo tsa bona. Pentekonta, ka tsela e khetheileng, e thusa ho etsolla ho hasana oa lelapa la botho la pele le ho thomeha ha lihlotšoana tsa merabe, ho qalileng ka tieo Toreng ea Babele. Mohlolo oa mohau o qala poelanyo ea lelapa la botho hape. Bonngoe ba kereke ea Molimo boemong ba lefatše kaofela bo paka ka sebopeho sa 'muso oa Hae o busetsang se ileng sa lahleha Babele.

Bonngoe ba Kopano ea Boena

Ho arabela thero ea Petrose le boipiletso ba pako le pholoho, batho ba ka bang likete tse tharo ba etsa qeto ea ho amohela Jesu e le Mesia le phethahatso ea tšepiso ea Testamente ea Khale ho Israele. Molimo o ne o le tšebetsong lipelong tsa Batho bana kaofela ha bona. Ba bangata ba bona ba ne ba kile ba utloela ka Jesu ba le hole 'me mohlomong ba ba etela Jerusalema ka tšepo ea ho mo bona. Mohlomong ba bang ba ne ba kile ba bona Jesu 'me ba utloa melaetsa ea Hae le pholoso ea Molimo empa ba e-so ka ba etsa boitlamo ba ho ba balateli. Ka Pentekonta, Molimo ka mohlolo o ile oa kena lipakeng maphelong a barutuo 'me oa ba sebelisa ho ba lipaki tsa tsoho ea Jesu. Joale ba tseba hoba, lebitsong la Jesu, batho ba ka fumana tšoarelo ea libe tsa bona (Liketso 2:38).

Bala Liketso 2:42–47. Balateli baa ba pele ba Jesu ba ne ba etsa liketso life e le sechaba sa balumeli? Ke eng e ileng ea tlisa bonngoe boo bo makatsang?

Ho ea hlolla hore ketso ea pele eo sechaba sena sa balumeli se ileng sa kena ho eona e ile ea ba ho ithuta thuto ea baapostola. Thuto ea Bible ke tsela e bohlokoa ea ho thusa ka khoho ea semoea bakeng sa litho tse ncha. Jesu o ne a file barutuo thomo ea ho ba ruta “ ‘tsohle tseo ke le laetseng tsona’ ” (Matt. 28:20). Sechaba sena se secha se ile sa qeta nako se ntse se ithuta tsohle ka Jesu, ho tsoa ho baapostola. Ho ka etsahala hore e be ba ne ba kile ba utloela ka Jesu le bosebeletsi ba Hae; lithuto tsa Hae, litšoaantšo, le lithero; mehlolo ea Hae, eo kaofela e neng e hlaloso ea le phethahatso ea Mangolo a se-Heberu a ngotsoeng ke baporofeta. Hape ba ne ba nka nako thapelong le ho arolelana bohobe. Ha ho ea hlaka hore na ho arolelana bohobe ho supa ka kotloloho Selallo sa Morena kapa ho mpa ho supa ka bonolo ho ja 'moho, joalo ka ha iketso 2:46 e utloahala e bolela ka bonolo feela. Ho bua ka kopano ea boena e tšoaela hore sechaba sena se secha sa balumeli se ne se qeta nako 'moho, hangata 'me ka nako e hlakileng, tempeleng Jerusalema, eo e neng e ntse e le setsi sa borapeli le khumamelo ea bona ka nako eo, le malapeng a bona ka bobeli. Ba ne ba phela hammoho ka katamelo e khoho. Ba ne ba e-ja le ho rapela hammoho. Thapelo ke ntho ea bohlokoa sechabeng sa tumelo, 'me e bohlokoa bakeng sa khoho ea moea. Sechaba sena se secha se ne se qeta nako khumamelong. Ba ne ba joetsitsoe hore liketso tse na li ne li etsoa ka “tseo.” Kopano ena ea boena e tiileng e ile ea tlisa likamano tse ntle le ba bang Jerusalema. Balumeli ba bacha ba hlaloso ba ne ba “khahlisa sechaba kaofela” (Liketso 2:47). Ha ho tika-tiko hore mosebetsi oa Moea o Halalelang o ba amme, oa ba oa hahlamela baba potileng ka matla a maholo 'me oa sebetsa e le bopaki bo matla ba 'nete le ba Jesu e le Mesia.

Kereke ea heno e ka ithuta eng moo ka mohlala o teiloeng moo mabapi le bonngoe, kopano ea boena, le bopaki?

Ho Fana le Meharo

Luka o re bolella hore se seng se ileng sa hlahisoa ka kotloloho ke kopano ea boena e ileng ea fihleloa ke balateli ba Jesu hang kamor'a Pentekonta ebile tšehetsano. "Bohle ba lumetseng ba ne ba lula hammoho; ba ne ba kopanya lintho tsa bona kaofela hore e be tsa bohle. Ba ne ba rekisa ka masimo a bona le ka mesebetsi ea bona, 'me ba ne ba abela bohle, kamoo e mong le e mong a hlokang kateng" (Liketso 2:44, 45). Ho arolelana lintho hona ha se se hlokoang bakeng sa phelisoana empa ke ntho e iketsahallang ka lebaka la lerato la e mong ho e mong boiphihlelong ba kopano ea boena eo ba bang le eona. Hape ke ponahatso ea bonngoe ba bona bo tiileng. Tšehetsano ena e ile ea tsoela pele nakoana e itseng, 'me re fuoa lintlha tsa eona ka bophara ho Liketso 4 le 5. Hape ke taba eo re e fumanang hape libakeng tse ling Testamenteng e Ncha, joaloka ha re tla bona kamor'a mona. Ke hona moelelong ona moo Barnabase a hlahisoang lekhetho la pele. O hlahella e le motho ea ruileng ea neng a na le naha. Kamor'a hore a rekise thepa ea hae molemong oa sechaba, eaba o tlisa chelete ho baapostola (Liketso 4:36, 37). Barnabase o hlahisoa e le mohlala o motle o ka lateloang.

Bala Liketso 4:32–37 le 5:1–11. Bapisa boitšoarō ba Barnabase le ba Ananiase le Safira. Ho ile ha fosahala kae ka balekane baa?

Kathoko ho sebe sa bona se hlakileng sa ho thetsa Moea o Halalelang, batho bana ba bontšitse meharo le lerato la leruo. Kamohlomong ha ho sebe se ka senyang kopano ea baena le lerato la boena joaloka boikhabo le meharo. Haeba Barnabase e ne e le mohlala o motle bakeng sa moea oa kereke ea pele oa kopano ea boena, Ananiase le Safira ke ho fapaneng. Luka oa tšepahala ka ho hlahisa pale ena ea batho ba se nang bokhabane sechabeng. Melaong e Leshome (Exod. 20:1–17), molao oa ho qetela, ka lerato la leruo kapa takatso ea leruo, ha o tsoane le e meng. Ha melao e meng e bua ka liketso tse tloang thato ea Molimo ka botho ka tsela e bonahalang, molao oa ho qetela o bua ka se patiloeng ka pelong. Sebe sa lerato la leruo ha se ketso; empa, ke se etsahalang mehopolong. Lerato la leruo, le 'mate oa lona boikhabo, ha se sebe se bonahalang empa ke boemo ba sebopelo sa boetsalibe sa motho. Se bonahala feela ha se hlahella liketsong tsa boikhabo, joaloka seo re se boneng ho Ananiase le Safira. Hantle-ntle molao oa ho qetela ke motso oa bokhopo bo bonahalang liketsong tse khalemeloang ke melao ena e meng kaofela. Lerato la bona la leruo le ile la ba bulela tšusumetso ea Satane, e ileng ea ba lebisa ho thetseng Molimo; sena ha sea fapana le seo lerato la leruo le ileng la lebisa Judase ho se etsa le eena.

Ke litsela life tseo ka tsona re ka qokolang lerato la leruo ka metso maphelong a rona? Hobaneng ha poko le teboho e le sehlare se matla ho phekola bokhopo boo?

Hopolang Bafumanehi

Ho arolelana lintho tsa e mong le ba bang hangata e ne e le pontšo ea bongoe kerekeng ea pele. Ho fana ho hlalosoang likhaolong tsa pele tsa buka ea Liketso ho tsoela pele hamorao ka Pauluse ha a memela likereke tseo a li theileng Macedonia le Achaia ho bokellela bafumanehi ba Jerusalema (sheba Liketso 11:27–30, Ba- Baga. 2:10, Ba-Roma 15:26, 1 Ba-Kor. 16:1–4). Mpho eo e fetoha pontšo e tšoarehang ea 'nete ea hore likereke, tseo bongata ba litho tsa tsona e neng e le balumeli ba Balichaba, li hlokomela le ho rata baena le likhahatseli tsa bona tsa moloko oa ba-Juda ba leng Jerusalema. Ho sa natsoe phapano tse teng tsa meetlo le bochaba, ba etsa 'mele o le mong ho Kreste 'me hammoho ba tšoere evangeli e tsoanang. Taba ena ea ho arolelana le ba bohloking ha e bontše feela bongoe bo ne se ntse bo le teng kahar'a kereke empa ho boetse ho tiisa bona bongoe boo.

Bala 2 Ba-Korinthe 9:8–15. Pauluse o re litholoana tsa ho fana ho hlahellang kerekeng e Korinthe e tla ba life?

Boiphihlelo ba bongoe kerekeng ea pele bo re bontša seo re ka se etsang le rona kajeno. Bongoe, leha ho le joalo, ha boa tla kante ho boitelo le boitjoetso ba balumeli. Baetapele ba sechaba sa pele ba ile ba bona e le bosebeletsi ba bona ho sebeletsa bongoe ho Kreste. Joaloka ha lerato pakeng tsa monna le mosali le bana e le boitlamo bo lokelang ho etsoa ka boitjoetso letsatsi le letsatsi, ho joalo feela ka bongoe har'a balumeli. Bongoe boo re nang le bona ho Kreste bo khothalletsoa le ho bonahatsoa ka litsela tse 'maloa. Ntlha e ileng ea tlisa bongoe bona ka tsela e hlakileng kerekeng ea pele e bile thapelo, khumamelo, kopano ea boena, pono e tsoanang, le boithuto ba Lentsoe la Molimo. Ba ne ba sa utloisise feela thomo ea bona ea ho hasa evangeli ho lichaba tsohle, empa ba ile ba boela ba elleloa hore ba na le boikarabello ba lerato le tlhokomelo e mong ho e mong. Bongoe ba bona bo ile ba bonahala ho faneng le tšehetsanong likopanong tsa bona tsa boena tsa lehae, le ka ho pharalla, lipakeng tsa liphutheho tsa likereke, leha ba ne ba ka aroloa ke bohole ba libaka. “Ho fana ha bona ho ne ho paka hore ha ba ka ba amohella mohau oa Molimo lefeela. Ke eng e neng e ka hlahisa ho fana ho ho kaalo ha e se Moea? Mahlong a balumeli le ba sa lumelang e ne e le mohlolo oa mohau.”—Ellen G. White, *The Liketso of the Apostles*, leq. 344.

Uena le kereke ea hau le bile le boiphihlelo ba ho fumana melemo ea ho fana ho ba bang ka litsela li fe? Ke hore, ke mahlohonolo a fe a tlelang ba fanang ho ba bang?

Ho Ithuta Haholoanyane:

Ellen G. White, “Pentecost,” maq. 35–46, ho *The Liketso of the Apostles*. “Ho fana hona ha balumeli [ho Liketso 2:44, 45 le 4:32–35] e bile tholoana ea tšollelo ea Moea. Ba neng ba sokolohetse evangelizing ba ne ba le ‘pelo e le ’ngoe le moea o le mong.’ Ba ne ba laoloa ke takatso e tšoanang—katleho ea thomo eo ba e tšepetsoeng; ’me lerato la leruo le ne le se na sebaka maphelong a bona. Lerato la bona ho baena ba bona le mosebetsi oo ba keneng ho oona le ne le feta lerato la chelete le maruo. Mosebetsi ea bona e ne e supa hore ba ne ba nka meea ea batho e le ea bohlokoa ho feta maruo a lefatše. “Ho tla lula ho le ka mokhoa o joalo ha Moea oa Molimo o laola bophelo. Bao lipelo tsa bona li tletseng ka lerato la Krete, ba tla latela mohlala oa Hae eo ka lebaka la rona a ileng a ba mofumanehi, e le hore ka bofumanehi ba hae re tle re be barui. Chelete, nako, tšusumetso—limpho tsohle tseo ba li amohetseng ho tsoa letsohong la Molimo, ba tla bona e le tsa boleng ha feela e le tselo eo ka eona ba ka ntšetsang pele mosebetsi oa evangeli. Ho bile ka mokhoa o joalo kerekeng ea pele; ’me ha kerekeng ea kajeno ho bonahala ka matla a Moea litho li tlositse lerato la tsona linthong tsa lefatše, ’me ba ikemiselitse ho etsa lihlabelo molemong oa hore ba habo bona ba utloe evangeli, linnete tse phatlalatsoang li tla ba le tšusumetso e matla ho ba li mametseng.”—Ellen G. White, *The Liketso of the Apostles*, maq. 70, 71.

Lipotso tsa Puisano:

1. Bala hape lintho tsa thuto ea bekeng ena tse thusitseng ho bopa bonngoe boo kereke ea pele e bileng le boiphihlelo ba eona. Re le kereke kajeno, re ka etsa joang, hore re etse lintho tse tšoanang? Ke hore, ke sefe seo e ka bang ha re na sona ha re bapisoa le se neng se etsahala har’a balumeli ka nako eo?
2. Ke joang mohlala oa likereke tsa pele tsa Testamente e Ncha oa ho fana ka linyehelo tse ngata ho thusa bafumanehi ba Jerusalema e ka bang mohlala oa seo re lokelang ho se etsa kajeno? Lintho tse ling tsa phelisano tsona? Likereke tsa lehae li ka kenella joang metseng ea tsona molemong oa ho fokotsa bofuma le ho fana ka lithoko tse ling tsa mantlha?
3. Ke lithuto li fe tse ling tseo re ka li fumanang paleng e bolutu ea Ananiase le Safira? Bohlokoa ba poleloana e fumanehang ho Liketso 5:5 le 5:11 ka “tšabo e kholo” e ileng e tlela kereke ka lebaka la mafu ao a mabeli ke bofe?

Kakaretso: Kereke ea pele e ile ea hola ka sekhahla hobane barutuo ba Jesu ba ile ba ba le boikemisetsa ba ho itokisetsa tšollelo ea Moea o Halalelang oo ba neng ba o tšepisitsoe. Kopano ea bona ea boena le tumelo e tšoanang e ne e le mekhoha e neng e sebelisoa ke Moea o Halalelang ho lokisa lipelo tsa bona bakeng sa Pentekonta. Kamor’a Pentekonta, Moea o Halalelang o ile oa tsoela pele ho fetola phutheho ena e ncha, joaloka ha ho bonahetse ho faneng ha bona e mong ho e mong le kholo ea kereke ka sekhahla.